

Kayëta ir Yud in

Lilaya in

Ar yëgwëk kayëta ijo an, Yud këno wacënd. Kayëta iromax ijo kë sëyali ind mëne bërëwäk end Yesu Kërisët bën këreni tëfënd na osëyali or fudac or kë rend mëne bësošan do gë bësoxari bër gër Amara bën asëk alakira fo ex gayik Kaxanu aseban ko sebanënd. Ata Yud aÿëgw yëgw ko bamatinali band gër bakayëta bakarëk ebi masinaxën bërëwäk bën mëne Kaxanu axiti ko xitind osëmbak ol. Kayëta ijo hatak gë cale ind kë rend mëne Kaxanu kë yëlënd apexa an paß gë Yesu Kërisët. Er ex gër akayëta in:

Ecëmar el: 1-2.

End ekwëta el do gë osëyali onëgwëß eñ: 3-23.

End cale eñ: 24-25.

Ecëmar el

1 ¹ Wëno Yud, ariyenin ar *Yesu *Kërisët an, ar acël amat gë **1** ¹ Şak añ, këjun yëgwënëlınd wën bër wacëraw këjun Faba Kaxanu, han këjun, do xwëtaya këjun gër *Yesu Kërisët! ² Awa Kaxanu kaÿënanëleño wën do yëlëleñun mbañ, obetak ol do gë añana añ!

End bësëyali bënëgwëß eñ

³ Wën bëmaÿe bënd ke balënd mbañ bëño, gë obal osëm yandi baxe mun nëgwënëli end apexa and şot këne biyi dek eñ. Gërëgako nang këme, afo mun nëgwënëli en kemënalixën ekwëta ed këbi yëlënd Kaxanu amat fo bërëwäk el. ⁴ Enimin, bela bëwëşik exëna bër lila këjun yir fo do këni nëmbënd oyekax or ko yëlënd Kaxanu ol gë oñandi oñacaxik. Bën aÿaxëta këno yaxëtand *Yesu *Kërisët, mëñ ar ex Asëyali do Axwën an. Ata kiti indebën iñ anëka fo yëgw këni.

⁵ Anang nang kën dek beño, axwitan fo këmun xwitanënd mëne Axwën an racët babi gër oxadëp bulunda ir Isërayel in gër ebar ed Misëra. Barikan alañ lañ babi bër hëp bax eno kwëta bën.

⁶ Kwitayin bëte end omeleka od sak babi or gapak or şot bani ol, Kaxanu afokëra fokëra këbi or lañ gëd gër acamëdan xali yatir akey atëm and kiti. ⁷ Mondako fo bax bëte end bela bër lëg bax gër bangol band Sodom gë Gomor do gër band hi bax ler ler bañ. Awata wata bani becëfënañ do gë eñac xali babi yandind laka

ir ax ñap ex na in. Gërëgako, asoro këni sorond gër xoɖux or din ir din, or ax domind na gë edomi. Do toro indebën injo këbo w̄asinënd ang këbi hiɖ ak dek bër kë rind mondako bën.

⁸ Awa bela bër lila kënun yir fo bëjo mondako fo këni rind: oɖakeli odebën këni s̄fënd do këni buyarënënd beman bendebën beɲ. Ayepën këni yepënënd or gapak or Axwën ol do kënëbi širënd bangoc bacaraxik baɲ. ⁹ Xarak Mišel, alëngw ar omeleka an, axo yëxw bana eɲo nöp gë ocir šabucara in, and bani xandërënd eman end Moyis aɲ. Are fo re baɲo: «Axwën an ki rexëra!» ¹⁰ Bari bela bëjo ašir këni širënd er bayik ani nang ex na in. Do bebër nang këni gë onden këm, ang oɯacar fo bën, anemin këbi nemin. ¹¹ Awa bëjo abi ye ex na ga s̄f këni ako fëña ir Kaɣe in. Ang nambëra baxo Balam në end acosa ak nambëra këni. Bëte ang nemi ko Kore ak në end emëšen ed Kaxanu fo nemi këni. ¹² Bëjo abuyarën këni buyarënënd opëna od amara andewën ok. Er këni xwëndand wayët ñambëran, gë ošeb fo, ani gi ex na gë anjus. End ala abi balënd na, ang ax gi ex na end ogaf odebën fo. Ang baɲar band barër bax do šapëreliek ekoc tēbērëxe fo hi këni. Bëte er hi këni ang batëx bañambëyamb band ax dēwënd na fo xali xucak nand ebax ex dēw na. Bakëlëbəd baki šēsək ga rēt këni. ¹³ Ang kë watind bomuyar gër angwëngw and kë xanind men bërëxadët bomeɲ bomeɲ ak, mondako fo këni rind bela bëjo ex watixën becëfënaɲik bendebën beɲ. Bëte ang oɯal or kë y'exërand sam-sam gër orën fo hi këni. Do Kaxanu fenin këbi olëg or din ir din ol gër ed xurik ex camëɖan.

¹⁴ Enok, ar ex acongaxinëm gër andēwëra and Adam an, ayeyan yeyan baxo ang alaɯënel fo end bela bëjo eɲ: «Awël nde, Axwën an ayow ko yow gër ngwën ro gë omeleka omënëk odexëm ok owëli, owëli. ¹⁵ Ayow ko yow ebi kiti dek bela bën do ebi nöp bēsëmbak bën në end dek bandixa batëmbak band këno renanënd beɲ, do në end oyeyan oÿëɲënaɲ or bēsëmbak or këno yeyananënd bëwendëran oɲ.» ¹⁶ Bela bëjo laɲ bër šaminak fo hi këni. Laɲ këni rendërand end aniyandebën eɲ, do s̄f këni wayët oñandi odebën fo. Gër osëy orebën yer ndafënan itëm fo ex, xarak bela bën fo kënëbi yifand gë oyeyan onëngax eni cotaxën er yandi këbi in.

End aniyand oxëreceɲ eɲ

¹⁷ Wën cëɲ bëmaɣe bënd ke balënd mbaɲ bëjo, kwitayin end rey'a bani gana-gana fo oparëxanda od *Yesu *Kërisët, Axwën arebi eɲ. ¹⁸ Ga banun felënd wa: «Gër bakey bapelatar, bela bër kë sanënd mbaɲ kë šanayaw na, do eni tēfënd oñandi

oñëñenax ok, mène ngëñ betëmbak beñ.»¹⁹ Æbën ex bëyic bër bamara bën, ang oŵacar fo këni rind, do Angoc and Kaxanu añ ax gi ex na gër ola orebën.²⁰ Æbarikan wën bëmaÿe bënd ke balënd mbañ bëño, ang këni bayënd aciŵ ak, bay'in oxëreceñ orewën ol gër ekwëta emënëk ed šot këñ. Caleyindën gë Angoc añ.²¹ Kemëñayin gër añana and Kaxanu ga këñ šëñind ako axaÿënan ir *Yesu Kërisët, Axwën arebi, ir këbo yëlënd aniyan and din ir din in.²² Kaÿënanindëleñun bër sitarak gër ekwëta bën.²³ Æbërëmar afo enëbi dacëtënd gër xođux eni pexaxën. Æbëjo bëte kaÿënanindëleñun gë anjiÿ. Ado ax gi ex na dëñ mokwixëta acud andebën and buyarënëk beñëñenax bendebën añ.

Eduwa el

²⁴ Æduwanëñone Ar xorëk gabat eñun nëkonand këdi këñ wëndëra an. Æbëte ðuwanëñone ar xorëk eñun kwëšan, gë etëmbak këm an, gër lëngw ir enjaran endexëm, gë onënga fo.
²⁵ Mëñ gabat ex Kaxanu, ar fexën këbo pađ gë *Yesu Kërisët, Axwën arebi an. Mëñ gabat xwënëk enjaran eñ, panga iñ, owun ol do gë or gapak ol, elod ga ÿanak ngwën iñ, xali gërëgako do din ir din! Amen!